

Na osnovu člana 28. stav (5) Zakona o srednjem obrazovanju i odgoju - prečišćeni tekst („Službene novine Tuzlanskog kantona”, broj: 10/20, 11/20, 8/21, 1/21, 22/21, 5/22, 10/22, 11/22, 9/23 i 12/23)

PRAVILNIK
o saradnji roditelja učenika sa školom u cilju prepoznavanja/prevencije i/ili
sprečavanja neprihvatljivog ponašanja učenika

Član 1.
(Predmet Pravilnika)

Ovim pravilnikom uređuje se način saradnje roditelja/staratelja učenika (u daljem tekstu: roditelj) sa školom u cilju prepoznavanja/prevencije i/ili sprečavanja neprihvatljivog ponašanja učenika, te način postupanja škole kada se utvrdi nesaradnja roditelja učenika osnovne škole na području Tuzlanskog kantona.

Član 2.
(Rodna neutralnost)

Izrazi koji se koriste u ovom pravilniku, bez obzira jesu li korišteni u muškom ili ženskom rodu, obuhvataju na jednak način i muški i ženski rod.

Član 3.
(Neprihvatljiva ponašanja učenika)

Oblici neprihvatljivog ponašanja učenika kao i postupanje škole u slučaju neprihvatljivog ponašanja učenika propisani su odredbama posebnog propisa kojim se reguliše kućni red u školi a koji donosi ministar obrazovanja i nauke

Član 4.
(Prava i obaveze roditelja)

(1) Roditelj ima obavezu odazvati se na poziv škole, ukoliko je protiv njegovog djeteta pokrenut postupak za utvrđivanje odgovornosti odnosno disciplinski postupak, u terminu koji odredi škola.

(2) Škola na zahtjev roditelja može dogovoriti promjenu termina za razgovor.

(3) Ukoliko roditelj odbije saradnju sa školom i ne odazove se terminu za razgovor u školi, dva puta uzastopno, za učinjeno neprihvatljivo ponašanje koje je bližim propisom o povredama discipline, postupku za utvrđivanje disciplinske odgovornosti učenika, naknadi pričinjene materijalne štete, trajanju izrečene odgojno-disciplinske mjere, ublažavanju i ukidanju, te posljedičnom odnosu na ocjene iz vladanja učenika u srednjoj školi okarakterizirano kao lakša povreda discipline ili se ne odazove pozivu za učinjenu težu povredu discipline, škola će uz dostavljanje dokaza o nesaradnji roditelja i škole, obavijestiti nadležni centar za socijalni rad i inspekciju za obrazovanje.

(4) Roditelj ima pravo zatražiti od škole stručnu pomoć u cilju postizanja odgojne svrhe i neponavljanja neprihvatljivog ponašanja djeteta.

(5) Roditelj učenika ima pravo biti obaviješten o provođenju dodatnog i intenzivnog odgojnog postupka te ima obavezu učestvovati u provođenju intenzivnog odgojnog postupka.

(6) Roditelji imaju pravo biti informisani o problemima nasilja u koje su uključeni učenici kao i u postupak donošenja i razvijanja programa prevencije nasilja.

(7) Roditelji imaju pravo biti educirani o prevenciji nasilja kroz realizaciju radionica u školi.

(8) Roditelj učenika ima pravo biti obaviješten o prijavi nasilja nad učenicom, kao i nasilja koje je učenik počinio nad drugim licima u skladu sa ovim pravilnikom.

(9) Roditelj učenika ima pravo na savjetodavnu i stručnu pomoć u školi i izvan nje u slučaju nasilja nad učenikom.

(10) Roditelj učenika ima obavezu saradnje sa školom u okviru postupanja u slučajevima nasilja prvog nivoa.

(11) Roditelj učenika ima obavezu učešća u okviru postupanja škole u slučajevima nasilja drugog i trećeg nivoa.

(12) Roditelji imaju obavezu saradnje sa školom u slučaju postojanja sumnje na nasilje u porodici.

(13) Roditelj učenika ima obavezu saradivati sa školom u slučajevima nasilja nad zaposlenikom škole od strane učenika.

Član 5.

(Dostavljanje medicinske dokumentacije)

(1) Roditelj je dužan dostaviti školi medicinsku dokumentaciju učenika, koja uključuje nalaz i mišljenje ljekara specijaliste, ako učenik ima hronično oboljenje, teškoće u razvoju ili je korisnik psihoterapijskog tretmana, te pravovremeno informirati školu, odnosno razrednika o zdravstvenom stanju učenika.

(2) Ukoliko roditelj ne dostavi dokumentaciju iz stava (1) ovog člana i ne informiše školu, odnosno razrednika o zdravstvenom stanju učenika, smatrat će se da ne saraduje sa školom.

Član 6.

(Prevenција nasilja i sprečavanja neprihvatljivog ponašanja učenika)

(1) U cilju prevencije nasilja i sprečavanja neprihvatljivog ponašanja, škola za učenike i roditelje periodično organizira edukacije.

(2) Škola je dužna najmanje dva puta tokom školske godine organizirati edukativnu radionicu ili druge oblike predavanja za učenike i roditelje o temama prevencije nasilja, nasilničkog ponašanja i sprečavanja neprihvatljivog ponašanja učenika i sl.

(3) Edukacije iz stava (1) ovog člana u školi mogu realizirati i druge institucije i nevladine organizacije, uz prethodno pribavljenu saglasnost Ministarstva obrazovanja i nauke Tuzlanskog kantona.

(4) O održanim edukacijama iz stava (I) ovog člana na kraju polugodišta škola dostavlja informaciju Pedagoškom zavodu Tuzlanskog kantona (u daljem tekstu: Pedagoški zavod).

Član 7.

(Informiranje roditelja o roditeljskim sastancima, edukacijama i konsultacijama)

(1) Škola je dužna pravovremeno informirati roditelje o održavanju roditeljskih sastanaka, konsultacijama i edukacijama iz člana 6. ovog pravilnika.

(2) Poziv za roditeljski sastanak i edukacije iz člana 6. ovog pravilnika upućuje razrednik elektronskom poštom i/ili pismenom porukom.

(3) Obavijest o organizovanju edukacija iz člana 6. ovog pravilnika se oglašava i na zvaničnoj internet stranici škole.

(4) Termin za konsultacije sa roditeljima određuje razrednik u pravilu na roditeljskom sastanku.

(5) Informacija o terminima konsultacija iz stava (4) ovog člana treba biti dostupna na internet stranici škole.

(6) Roditelj je, u slučaju nemogućnosti prisustva roditeljskom sastanku, obavezan obavijestiti razrednika o razlozima nemogućnosti prisustva istom.

(7) Roditelji, tokom polugodišta, imaju obavezu prisustvovati najmanje jednom roditeljskom sastanku ijednim konsultacijama.

Član 8.

(Evidentiranje i dostavljanje izvještaja o neprihvatljivom ponašanju učenika)

(1) Škola vodi evidenciju o neprihvatljivom ponašanju učenika, izrečenim pedagoškim mjerama, saradnji škole i roditelja na prevenciji i sprečavanju neprihvatljivog ponašanja i dostavlja podatke elektronskim putem Pedagoškom zavodu, najmanje dva puta godišnje u formi izvještaja.

(2) Pedagoški zavod izrađuje elektronsku bazu podataka u cilju prikupljanja i analiziranja podataka iz stava (1) ovog člana, kao i za potrebe izvještavanja i utvrđivanja odgovarajućih mjera na suzbijanju neprihvatljivog ponašanja učenika i prevenciji međuvršnjačkog nasilja.

Član 9.

(Prijava roditelja za nesaradnju sa školom i izricanje sankcija)

(1) Škola je dužna obavijestiti inspekciju za obrazovanje i nadležni centar za socijalni rad ukoliko roditelj ne saraduje sa školom u skladu sa članom 4. stavovi (3), (5), (10), (11), (12) i (13), članom 5. stav (2) i članom 7. stav (7) ovog pravilnika.

(2) Uz obavijest iz stava (1) ovog člana škola dostavlja odgovarajuće dokaze, podatke o učeniku i roditelju, te istovremeno od nadležnih organa traži povratnu informaciju o poduzetim mjerama.

(3)) O poduzetim mjerama organi iz stava (1) ovog člana obavijestit će školu u roku od 8 dana od dana poduzimanja mjera.

Član 10.

(Postupak za izmjene i dopune Pravilnika)

Izmjene i dopune ovog pravilnika vršit će se na način i po postupku predviđenom za njegovo donošenje.

Član 11.

(Stupanje na snagu Pravilnika)

Pravilnik stupa na snagu osmog dana od dana objavljivanja na oglasnoj tabli škole.